

Me hirau³ atu te ra
Ko ia e haramai ra?
Tona hohoro whakaoma tonu
I te rangi tahi.

Maku e urutomo te whare koia
No Werawera,⁴
Kia pehia iho te kuri⁵ awarua
I a Toka⁶ ra.
Kati ki a koe,
Tukua mai ki au
He ngakinga mate.

Taku korotu⁷ atu i konei
Ma Te Paraha,⁸
Te tangata takitahi
E hoki ana i te Omutu.⁹

¹Koera:—Ka moe koe, ka oho ake, na e tuiri ana, e tukituki ana to poho.

²Waipohewa:—He wawata, he moemoea.

³Me hirau atu, etc.:—He whakatauki tenei.

⁴Werawera:—No Ngati-Toa, ko te papa o Te Rauparaha. I moe i a Parekohatu. Ko te whanau ko Te Rangitukua, ko Waitohi, ko Te Kiri-paeahi, ko Mahuranga, ko Te Rauparaha. I moe a Waitohi i a Te Ra-ka-herea ka puta ko Te Rangi-haeata raua ko Topeora. Ko ta Te Rauparaha wahine tuatahi ko Marore, na Te Rangimoewaka i patu i a ia i haere ai ki te tangi ki tetahi whanunga i Waikato.

⁵Kuri awarua:—Tirohia te waiata 131. He kahu kuri.

⁶Toka:—E ki ana a Te Taite ko te papa o Hipirini Toka o Ngati-Parekawa.

⁷Korotu:—Hiahia nui.

⁸Te Paraha:—Ko Te Rauparaha.

⁹Omutu:—Omutu-whenua, he po no te marama. Ko te marama i te toru tekau o nga po.